

Sprachwelten

Siemiar sut tschiel avert



von Sibylle Pfiffner

Mo sche jau aud gia il pled «openair» ma vegnan bunamain las larmas. A mai vegnan endament il fim, ils visitaders alcoholisads, la canera dals autpledaders e la savur da joints. Quests maletgs hai jau gia dapi mes emprim concert sut tschiel avert.

Cun in egl bragint ed in egl rient sfegl jau en mes ultims set diaris. En furma da chavazzins hai jau mess en scrit mias regurdientschas dals openairs. Son Gagl è stà il punct culminant durant mia carriera da concerts sut tschiel avert. Las bands, l'atmosfera, las spaisas e bavrondas – tut ha constà. Schizunt il robidog transformà en in gril ha ademplì si'obligaziun. Jau hai bragì larmas, cura che jau hai vesì quest apparat multifunziunal spizzalent. Però uschè bunas liongias n'hai jau mai pli mangià, gnanc al cumenzament da la stagiun da gril da quest onn. Damain legra è stada la perdita da mes eglers. Co dua in ins chattar eglers en in smugl da glied? E tuttina hai jau savì: «Il dretg temp en il dretg lieu ed jau als vegn a chattar...» Ils visitaders han applaudì ed jau sun ma fulschada tras la massa. Cun buna luna hai jau prendì si da plaun ils eglers. Il rom dals eglers era però tut rut - il resultat d'ina cumparsa coola cun eglers da suleagl è ida a fin cun in object smatgà plat, e sche jau na sbagli betg era anc cun in'arsentada dal suleagl. Quai na fa betg surstar, la finala è il sentiment da siemiar sut tschiel avert pli grond che l'intelletg. «Helga» - jau ma dumond anc oz danunder ch'il sbratg deriva. Constat l'istorgia dal chaun ch'è ì a perder sin l'areal da l'openair, il qual ses possessur ha clamà e tschertgà l'entira notg – sut tschiel avert?